


竹谿縣志

石卷  
一至卷三

池  
254.01  
38

地260.183  
38  
12





竹谿縣志卷之一

星野

釋名曰星散也言列位布散也自地至天一億一萬六千三百五十里揣測者多以某土某邑定星辰之纏度次舍未見其有合矣然三辰燭曜五緯重光見伏有時贏縮有度歷代察祲祥者必由之漢書曰天星皆有州國分野蓋陰陽二氣陶育羣生靈象所寄垂為列星故在野象物在朝象官在人象神隨地布精皆一氣之所運也谿邑僻在楚西北隅天星照臨明明在上矣作星野志

竹谿縣志

卷一星野

星野攷

周禮鄭註保章氏以星土辨九州之地封域皆有分星鶉尾楚也左傳鶉尾為楚史記翼軫荊州春秋元命苞軫星散為荊州漢書觜螭參益州翼軫荊州又曰楚地翼軫之分野費直周易起張十三度至軫七度為鶉尾荆楚分蔡邕月令章句起張十二度至軫六度謂之鶉尾班固三統歷自張十七度至軫十一度為鶉尾於辰在巳分野屬荊州皇甫謐世紀自張十八度至軫十一度曰鶉尾之次于辰在巳謂之大荒落於律為夷則斗建在申今楚分野晉書天文志翼軫楚荆





州唐書天文志翼軫鶉尾也初張十五度餘千七百九十五  
杪二十二太中翼十二度終軫九度自房陵白帝而東盡漢  
之南郡江夏東達廬江南郡濱彭蠡之西得長沙武陵又逾  
南紀盡鬱林合浦之地自沅湘上流西達黔安之左皆全楚  
之分自富昭度象龔繡容白廉州以西亦鶉尾之墟古荆楚  
鄖郡羅權巴夔與南方蠻貊之國翼與味張同象當南河之  
北軫在天關之外當南河之南張衡大象賦爰周翼軫厥土  
惟荆

按楚地分野歷考古籍皆以鶉尾翼軫當之雍正省志則以

竹谿縣志

卷一星野

鄖分野爲參翼軫左氏內傳曰參晉星漢書曰紫螭參益州  
今兩湖黔粵汝南漢中皆全楚之分而庸地與巴夔接壤介  
在雍梁荆三州之域則分野似在參翼軫之間今潯江嚴氏  
著三省邊防備覽謂鄖陽府之鄖縣在星六度房縣保康在  
張一度竹山張二上津張三鄖西竹谿在張四蓋翼軫分度  
當荆楚南界而竹谿踞楚北上游當在張翼之交占候者應  
以嚴氏爲據